

Samningur um rekstur dagdvalar á Sólvangi í Hafnarfirði

Hafnarfjarðarkaupstaður, kt. 590169-7579, Strandgötu 6, 220 Hafnarfirði (hér eftir Hfj.) og Sóltún öldrunarþjónusta ehf., kt. 650310-0710, Laugavegi 182, 105 Reykjavík (hér eftir SÖ), gera með sér eftirfarandi samning um rekstur dagdvalar á Sólvangi, Sólvangsvegi 2 í Hafnarfirði.

1.gr.

Gildissvið

Samningur þessi tekur til reksturs 14 dagdvalarrýma á Sólvangi, Sólvangsvegi 2 í Hafnarfirði, fyrir aldraða einstaklinga sem búsettir eru í Hafnarfjarðarkaupstað.

2.gr.

Lög og reglugerðir

Samningur þessi er gerður á grundvelli X. kafla laga nr. 40/1991 um félagsþjónustu sveitarfélaga og á grundvelli 3. tl. 13. gr., 15 gr., 16. gr. og 19. gr. laga nr. 125/1999 um málefni aldraðra.

Þá gilda um starfsemina reglugerð um dagdvöl aldraðra nr. 1245/2016 og gjaldskrá Sjúkratrygginga Íslands fyrir dagdvöl aldraðra á vegum stofnana sem ekki eru á föstum fjárlögum árið 2019 og eru án samnings um verð við Sjúkratryggingar Íslands nr. 1171/2018 eða sú gjaldskrá eða rammasamningur sem síðar kann að taka við.

3.gr.

Markmið samnings

Markmið samnings þessa er að tryggja öldruðum einstaklingum tiltekna þjónustu og styðja við aðstandendur þeirra með rekstri dagdvalar á Sólvangi.

4.gr.

Þjónustan

SÖ tekur að sér að sjá um rekstur 14 dagdvalarrýma fyrir aldraða á grundvelli 3. tl. 13. gr. laga um málefni aldraðra nr. 125/1999 fyrir íbúa Hafnarfjarðarkaupstaðar.

Um þjónustuna, umsókn um dvöl og samskipti fer eftir gjaldskrá Sjúkratrygginga Íslands fyrir dagdvöl aldraðra á vegum stofnana sem ekki eru á föstum fjárlögum árið 2019 og eru án samnings um verð við Sjúkratryggingar Íslands nr. 1171/2018 eða þeirri gjaldskrá eða rammasamningi sem síðar kann að taka við.

5.gr.

Réttindi og skyldur starfsmanna

Starfsmenn SÖ annast þjónustuna í dagdvölinni og því eru þeir aðilar sem ráðnir eru til starfa starfsmenn SÖ með öllum þeim réttindum og skyldum sem því fylgir. Starfsmenn munu starfa samkvæmt þeirri hugmyndafræði, lögum og reglugerðum sem starfsemin byggir á.

SÖ skal láta alla starfsmenn undirrita trúnaðaryfirlýsingu sem og þagnarheit og skulu starfsmenn bundnir þagnarskyldu um málefni einstaklinga í samræmi við gildandi lagaákvæði þar að lútandi.



pagnarskylda helst þó svo að þjónustusamningi milli aðila ljúki og einnig ef starfsmenn SÖ láta af störfum.

SÖ skuldbindur sig til að hlíta gildandi lögum og reglum um hollustu, vinnuvernd og aðbúnað á vinnustað.

6.gr.

Persónuvernd og öryggi

SÖ skal tryggja að öll vinnsla og meðferð á persónuupplýsingum sé í samræmi við lög um persónuvernd og vinnslu persónuupplýsinga nr. 90/2018. Ber SÖ ábyrgð á vinnslu þeirra persónuupplýsinga sem rekstur dagdvalarrýma skv. samningi þessum felur í sér.

Skal SÖ þ.á.m. gæta þess að viðhafa viðeigandi tæknilegar og skipulagslegar öryggisráðstafanir til að tryggja viðunandi öryggi upplýsinga og vernda þær m.a. gegn ólöglegri eyðileggingu, gegn því að þær glatist eða breytist fyrir slysi, gegn óleyfilegum aðgangi og gegn allri annarri ólögumetri vinnslu.

Yfirlýsing um tæknilegar og skipulagslegar ráðstafanir SÖ er fylgiskjal nr. 1 við samning þennan og er almenn lýsing á tæknilegum og skipulagslegu öryggisráðstöfunum sem SÖ hefur þegar gripið til.

7.gr.

Fjármögnun dagdvalar - greiðslur frá SÍ

Sjúkratryggingar Íslands (SÍ) greiða SÖ daggjöld og sendir SÖ reikninga vegna kostnaðar við veitta þjónustu mánaðarlega til SÍ sem greiðir eftir hvern almanaksmánuð. Framangreint skal gert í umboði Hfj. sé þess þörf. Á reikningi skulu koma fram kennitölur þeirra einstaklinga sem hafa nýtt sér dagdvöl undanfarinn mánuð.

Um greiðslur fer að öðru leyti eftir gjaldskrá SÍ fyrir dagdvöl aldraðra á vegum stofnana sem ekki eru á föstum fjárlögum árið 2019 og eru án samnings um verð við Sjúkratryggingar Íslands nr. 1171/2018 eða þeirri gjaldskrá eða rammasamningi sem síðar kann að taka við.

Engar viðbótargreiðslur eru greiddar frá Hfj. til SÖ vegna rekstur dagdvalarinnar.

SÖ ber fjárhagslega ábyrgð á rekstrinum og skuldbindur sig til að kaupa lögboðnar tryggingar.

8.gr.

Fjármögnun dagdvalar - greiðslur frá notendum dagdvalar

Greiðsluþátttaka hins sjúkratryggða vegna dagdvalar fer samkvæmt 19. gr. laga nr. 125/1999, um málefni aldraðra, með síðari breytingum, sbr. einnig reglugerð nr. 1245/2016 um dagdvöl aldraðra, með breytingum skv. reglugerð nr. 1174/2017. SÖ sér um innheimtu gjaldsins sem er innheimt mánaðarlega.

9.gr.

Húsnæði

Hfj. leggur starfsemi til húsnæði á Sólvangi, Sólvangsvegi 2 í Hafnarfirði án endurgjalds.

SÖ greiðir hins vegar allan sérgreindan kostnað af hinu leigða, svo sem rafmagn, hita og ræstingu.

SÖ hefur afnot af rými dagdvalar sem staðsett er á fyrstu hæð í gamla Sólvangi, merkt með gulu á teikningu sem er fylgiskjal nr. 3 með samningi þessum, auk nauðsynlegra stoðryma og sameignar. Gert er ráð fyrir að farið verði í endurbætur á gamla Sólvangshúsinu og verða þá breytingar á staðsetningu dagdvalar í húsinu. SÖ hefur tillögurétt um breytingu á húsnæði til dagdvalar í húsinu.

Fylgiskjal nr. 4 sýnir eldhús, þvottahús og búningaöstöðu sem er afnota fyrir allt húsið.

SÖ hefur jafnframt aðgengi að sameign í húsinu.

SÖ er rekstaraðili hjúkrunarheimilis í nýbyggingu við Sólvang. Fylgiskjal með samningi þessum er samningur SÖ og Hfj. um afnot húsnæðis í Sólvangi vegna reksturs hjúkrunarheimilisins.

10. gr.

Samstarf

SÖ og Fjölskylduþjónusta Hfj. skulu funda reglulega til að tryggja árangursríkt samstarf og samræma áherslur milli aðila.

11. gr.

Skýrslur, eftirlit og árangur

SÖ mun halda skráningu yfir kvartanir og skilgreina boðleiðir þeirra og meðferð sem lið í gæða og umbótarstarfi þjónustunnar. Hfj. getur kallað eftir þessum upplýsingum og fær þá kynningu á þeim kvörtunum sem hafa borist og úrlausnum. Hfj. er heimilt að gera úttekt á starfseminni hvenær sem er á samningstímanum.

12. gr.

Vanefndir

Verði uppi ágreiningur milli samningsaðila um efni samnings þessa og/eða telji aðilar samninginn vanefndan af hálfu gagnaðila, skulu samningsaðilar leitast við að jafna ágreining sinn.

Ef annar aðili samnings þessa vanefnir með verulegum hætti samningsskyldur sínar er unnt að fara fram á riftun samningsins. Samningi verður þó ekki rift nema vanefnd sé veruleg enda hafi aðili áður gert gagnaðila samnings þessa viðvart með skriflegri tilkynningu og sett honum hæfilegan frest til úrbóta.

13. gr.

Ágreiningsmál

Mál er kunna að rísa vegna brota og vanefnda á samningi þessum skulu rekin fyrir Héraðsdómi Reykjaness.

14. gr.

Endurskoðun

Heimilt er að fara fram á endurskoðun samnings þessa sé notkun á fjölda dvalarrýma ófullnægjandi að mati samningsaðila.

15. gr.

Breytingar og framsal

Breytingar á samningi þessum skulu einungis gerðar með skriflegum og löglega undirrituðum viðbótarsamningi milli aðila. SÖ má ekki framselja samninginn nema með skriflegu leyfi Hfj. Þetta gildir þó ekki ef um félag er að ræða sem er innan sömu fyrirtækjasamstæðu og SÖ en SÖ skal tilkynna til Hfj. um slíkt.

16. gr

Gildistími. Uppsögn

Samningurinn gildir frá 1. apríl 2019 til og með 31. desember 2020 og lengur verði honum ekki sagt upp. Samningnum er hægt að segja upp með sex mánaða fyrirvara beggja aðila og skal uppsögnin vera skrifleg.

Samningur þessi er gerður í tveimur eintökum, einu handa hvorum aðila og telst hvort um sig fullgilt frumrit samnings.

Hafnarfirði, 3. maí 2019

f.h Hafnarfjarðarkaupstaðar



f.h Sóltúns öldrunarþjónustu ehf



Fylgiskjal nr. 1: Tæknilegar og skipulagslegar ráðstafanir.

Fylgiskjal nr. 2: Samkomulagi milli HFJ og SÖ um afnot af húsnæði fyrir hjúkrunarheimili í Hafnarfirði

Fylgiskjal nr. 3: Afmörkun dagdvalarrýmis

Fylgiskjal nr. 4: Afmörkun sameiginlegra rýma